

Forum Istorgia dal Grischun, part 1: La Veglia Republica

Istorgia politica – relaziuns socialas – giurisdicziun – fatgs confessiunals

■ **Chattà preschenta las emissiuns davart temas da l'istorgia grischuna che Adolf Collenberg ha realisà tranter il 2007 ed il 2016 per il «Forum» dal Radio Rumantsch.** Las singulas contribuziuns èn accessiblas sur www.rtr.ch/archiv/il-forum u sa laschan emprestar en la Biblioteca chantunala sin disc cumpact.

Las eroxas ed ils eroxs dal Grischun (part 1)

I na dat betg mo ils eroxs naziunals svizzers, er nus Grischuns possedain ina galateria imposanta da persunas istoricas realas u legendaras.



Las valurusas Lumnezianas (1352), il Gi-on Caldar da Schons (enturn 1450), la Duonna Lupa (1499), il surmiran Tgasper Frisch (1637/38) e la Kanonenmaid Onna Maria Bühler da Domat (1799). Tut ils eroxs e las eroxas èn da lingua rumantscha e mintga idiom ha ses agen erox u sia eroxa. Ed il grond Benedetg Fontana appartegna a tuts. Lur muntada na giascha betg en l'existenza reala sco persunas, mabain en quai ch'els evocheschan en ils raquints. (Emissiun dals 18 da mars 2012).

Las eroxas ed ils eroxs dal Grischun (part 2)

La Svizra ha Guglielm Tell ed Arnold Winkelried e nus Grischuns avain noss Benedetg Fontana. Entant che Tell e Winkelried èn figuras legendaras, ha il Fontana propi vivì ed el era il 1499 per propi a la Chalavaina. A maun da duas chanzuns guardain nus en quest lieu da tanta muntada istorica. Dentant er or da Benedetg Fontana han ins fatg ina legenda, e propi famus è er el daventà pir blers onns pli tard. Il Forum preschenta l'istorgia e la legenda da noss erox che «mussa a nus la via tras il fiu dals battagliaius». (Emissiun dal prim d'avrigl 2012).

Vuclina 1512 (parts 1 e 2)


Il zercladur 2012 èsi vegnì commemorà la conquista grischuna da la Vuclina, Buorm e Clavenna l'onn 1512 e l'istorgia comunabla ch'ha quasi durà trais tschientaners. Han ins recepì da lez temp ils conquistads sco confederads u sco pajais subdits? Co han ils Grischuns administrà quest territori? Tge dretgs avevan las vischnancas en Vuclina? Tge effects positivs ha la conquista gi per l'economia vicendaivla? E pertge èn ils Grischuns e lur anteriurs subdits sa separads, malgrà la buna conjunctura? Adolf Collenberg preschenta resultats dals referats tegnids per la commemoraziun a Tiraun e Poschiavo. (Emissiun dals 6 da matg e 29 da fanadur 2012).

Il Medeghin

Gian Giacomo Medici è daventà il 1523 chastellan dal signoradi da Müsch, situà en la part sura dal Lai da Como. El ha transfurmà ses chastè en ina fortezza e stgaffì in'atgna flotta, cun la quala el ha pudì controllar e smanatschar il traffic dals Grischuns cun il ducadi da Milaun. Il chastellan rapinader ha er provocà duas guerras cun ils Grischuns. Il Forum sa metta sin ils fastizs dal condottiere ch'era a sias uras ina da las persunas las pli odiadas dals Grischuns – in odi ch'ha dentant er manà ad in dals emprims texts rumantschs, a la «Chanzun da la guerra dalg Chiestè d'Müs» da Gian Travers. (Emissiun dals 20 d'avust 2011).

Ina banda da rubiestis maldisciplinads

Il guerrier da la Veglia Republica grischuna n'era betg mo in schuldà, mabain in caracter guerrier integrà en la vita da mintgadi. I sa tractava per regla da giuvenils malruassaiels che tschertgavan l'aventura en l'ester e la sbarrada a chasa.



Protocol da la Veglia Republica da las Trais Lias.

FOTO: ARCHIV DAL STADI

Els furmavan il bratsch armà da la cumpagnia da mats. Quests guerriers ordai fer la disciplina militar sa laschavan mobilisar per enguladitschs da biestga sin alps estras, per faidas famigliaras e sbarradas tranter vischinadis pervi da cunfins. Brutalitat, malignadad e manco da disciplina eran lur attributs. (Emissiun dals 3 da matg 2015).

Mercenaris grischuns en terras estras (part 1)

Tranter il 1496 ed il 1848 han millis e millis da Grischuns bandunà lur patria per prestar servetsch militar per pussanzas estras. La miseria, il gust da l'aventura, la perspectiva da far gudogn e carriera eran per giuvens Grischuns ils motivs da ristgar lur pel. Per il stadi da las Trais Lias e lur vischnancas eran quests servetschs mercenaris in factur economic e politic impurtant. Ma tgi fascheva il grond gudogn e co eran organisads quests affars cun daners maclads da sang e da corrupziun? (Emissiun dals 23 da mars 2014).

Mercenaris grischuns en terras estras (part 2)

Ils onns 1740 servivan a medem temp passa 10'000 Grischuns en armadas estras. Tgi tschertgava simplamain ina lavur, tgi l'aventura a l'ester entant che auters faschevan cun atgnas cumpagnias il grond gudogn. A maun da differents exempels illustrescha il Forum l'impurtanza ed ils mecanissem da quests affars sanguinus. Sper ils daners èn dentant er returnadas ideas e tecnicas da l'ester ch'han fructifitgà la vita sociala e culturala en il Grischun. (Emissiun dals 13 d'avrigl 2014).

Genatsch – canagl u patriot

Cumenà ha el sia carriera sco predigtant reformà il 1517 a Scharons e terminà ella sco politicher catolic ina notg da tschaiver il 1639 a Cuir. Güerg, Gieri u Jörg Jenatsch aveva pliras fatschas. El era in um da la spada sanguinusa durant il temp violent dals Scumbigls grischuns ed è daventà a la finala sez unfrenda da la violenza. El gira ozendi sco persuna istorica mez reala, mez legendarà tras l'istorgia grischuna e svizra. Il Forum dat in'egliada a tut questas ingredienzas che fan da Genatsch in opportunist, in um d'onur, in canagl, in patriot... (Emissiun dals 17 da zercladur 2012).

È quai l'ossa da Genatsch? In crimi archeologic

La veglia Republica da la Trais Lias è adina puspè vegnida scurlattada da cumbats tranter differentas fracziuns, religiuns e famiglias – ina vita politica cun corrupziun, faidas e sbarradas anarchicas. Il pli accentuà era tut quai durant il temp dals Scumbigls grischuns ed il represchentant il pli tipic per questa politica è il predigtant guerrier Gieri Genatsch u Güerg Jenatsch. Sper ina

skizza dal temp sa metta l'istoricher Adolf Collenberg sin ils fastizs dal crimi scientific ch'ha lubì da sclerir l'identitad da l'um sepulì sut l'orgla en la catedrala da Cuir. (Emissiun dals 14 da zercladur 2015).

L'aristocrazia e lur clientella

Il sistem politic da la Republica da las Trais Lias sa basava sin relaziuns persunalas, economicas e politicas tranter ils nobels regents ed il pievel cumin. La ritgezza da famiglias sco ils Demonts, Sprechers, Salis u Plantas era la premissa economica per insomma pudair sa deditgar als uffizis. Ils uffizis furmavan lur basa politica ed eran a medem temp ina pussaivladad per s'acquistar dapli ritgezza. Però mo tgi ch'aveva in bun sistem da clientella aveva er la basa electorala necessaria. Il Forum porscha in'invista en quest sistem da dependenzas ed avantatgs vicendaivels. (Emissiun dals 5 da favrer 2012).

Jacob Jecklin il ritg (1644–1704)

En la vegliadetgna da 10 onns è Jacob Jecklin parti da Zuoz per l'Italia. Sco chalger, schuldà e commerziant è el viajà tras la mes'Europa. Il 1667 è el parti en servetsch militar da l'Olanda per l'India, arrivà è Jecklin dentant mo en fin il Cap dal Sid. Qua ha el avert in affar per rauba da pel. Tschintg onns suenter s'embartga el per l'insla Java, nua ch'el marida ina Giapunaisa. La dunna e ses tschintg figls èn dentant morts baud. A Java ha el fatg commerzi cun diamants ed è returnà suenter 44 onns sco un ritg en sia patria a Zuoz. La vita d'in grond aventurier, raquintada da Adolf Collenberg. (Emissiun dals 15 da mars 2008).

Ils vegls Grischuns: selvadis e brutals?

In magistrat da Turitg scriva l'onn 1750, suenter in viadi en Surselva: «Ils Sursilvans mussan en lur fisionomia pauc umanità, anzi fan parita da selvadis e brutals.» L'istoricher Adolf Collenberg dat in sguard a la parita dals vegls Grischuns, lur nutriment ed a las malsognas. Tranter auter raquinta el er l'istorgia da la famosa guerra e la curta vita da la charnpiertg engiadinaisa da l'onn 1565. (Emissiun dals 3 da favrer 2007).

Or da l'istorgia medicinala

«Sin la vart che fa mal duai vegnir averta l'avaina dal bratsch e duai vegnir tratg giu 3–4 dl sang. Quai è da repeter in di pli tard. Sch'i na gida anc adina nagut, pon ins unscher la part che fa mal cun pulvra da bau capiergna maschadada cun mustarda.» Quai è in vegl recept per malcostas, per ina puntga. Il Forum fa in viadi tras l'istorgia medicinala dal Grischun e rapporta dad itgs, curas da chaval, da sanganadas, da la fevra marscha, da pastraccas che mazzavan ils uffants e da la benedicziun da las virolaziuns introducidas avant var 200 onns. (Emissiun dals 19 da schaner 2014).

Il mitus da la chatscha libra (part 1)

Ils Grischuns tgiran e cultiveschan il mitus da la chatscha libra. Dentant datti questa pir dapi var 150 onns. L'istoricher Adolf Collenberg fa in viadi tras l'istorgia da la chatscha grischuna: dals chatschaders e rinnaders da la preistorgia sur ils privilegis dad uestg ed avats a la chatscha da revier dals signurs e cumins. El raquinta da Diana e Hubertus, da las tecnicas da chatscha e da las emprimas mesuras da protecciun. Dapi cura datti patentas da chatscha e tge animals avevan ils vegls Grischuns en mira? Quels gievan magari er gia a chatscha il schaner. (Emissiun dals 5 da schaner 2008).

Mastergns e mastergnants (part 1)

En s'istorgia n'è il Grischun betg stà populà mo da puraglia, prers e signuria – anzi er da mastergnants. Quels giudevan en fin il novissim temp pauc stima davart da la puraglia e signuria, malgrà la grond'impurtanza da lur servetschs da spezialists per la societad da vitg e citad. Nus ans mettain en quest'emprima part dal Forum sin ils fastizs da lur istorgia dal temp da bronz en fin circa l'onn 1800. (Emissiun dals 16 da zercladur 2007).

Il Vorarlberg rumantsch

Ils cunfins politics e linguistics èn instabils. Tge ch'è oz a l'ester, era magari ina giada in'unitad. Istorically e linguistically camain ans collia bler cun noss vischins en il nordost. La lingua roman-rumantscha ha marcà per tschientaners la Val dal Rain Songagliaisa, il Principadi da Liechtenstein ed il Vorarlberg. Questa istorgia comunabla cun nus Rumantschs e Ladins è pauc enconuschenta, er sch'ella s'extenda sur var 1500 onns ed ha laschà enavos ses fastizs linguistics en questas regiuns en fin oz. (Emissiun dals 26 d'avust 2012).

Il process criminal en la Republica da las Trais Lias (1500–1800)

La giurisdicziun da la veglia Republica da las Trais Lias n'enconuscheva nagin dretg unifitgà. Mintga cumin giuditgava tenor atgnas leschas e tradiziuns. Tuttina existiva in muster fundamental da process e procedura. L'istoricher Adolf Collenberg dat in sguard a las tractativas avant dretgira, als derschaders, l'atgisa ed a la lavur dal boier. A tgi vegniva concedi tge tractament e pertge na faschev'ins ad ina dunna mai «l'onur» da tagliar giu il chau? (Emissiun dals 3 da mars 2007).

Avant il tribunal – quai hai er dà tar nus

Schabetgs misterius, striegns, acziuns asocialas, offensius da dignitad, tgisas da paternitad e malfatgs atgnamain da bagatella, dentant privlus per la cuminanza. Quai èn cas civils e criminals da la Lumnezia dal 16avel al 18avel tschientaner, tipics per l'entir chantun Grischun. Ina schelta da sentenzias or da la collecziun da funtaunas da dretg, cumparidas l'onn 2012. (Emissiun dals 21 d'avrigl 2013).

Il carnifex vegn

El fascheva la lavur che nagin na vuleva far: il carnifex / hentger / anger / boier. Quest soci da la mort era nizzaivel a la dretgira veglia dal Grischun e sbittà da tuts. Sch'il confess mancava, aveva il carnifex da far vegnir a la glisch la «vardad» cun torturar ils accusads ed exequir la sentenza cun fiu, aua u spada. En il Forum preschenta l'istoricher Adolf Collenberg er l'aspect social ed economic da la professiun dal carnifex. (Emissiun dals 20 da november 2010).

Jakob Bundi, Viadi a Jerusalem 1591/92

Jakob Bundi da Sumvitg (1565–1614) era spiritual ed a partir da l'onn 1593 è el stà avat da la claustra da Mustér. Avant si'elecziun ha el dentant fatg in viadi da pelegrinadi a la Sontga Fossa a Jerusalem. E cun el anc set cumpatriots da la Cadi. En il Forum cumpogna l'istoricher Adolf Collenberg ils pelegrins sin lur viadi sur Vaniescha, la Cipra e la Mar Mediterrana en Terra Sontga. (Emissiun dals 17 d'october 2009).

La disciplina ecclesiastica d'antruras

In mandat da morala dal 1658 ordaina per las dumengias: «Nagin na duai dar ni tetg ni letg a giugaders e sautunzs, e quai sut paina d'in flurin.» En la veglia Republica da las Trais Lias procuravan mandats ecclesiastics, catolics e reformads per ina sanctificaziun severa da dumengias e firads. Questas prescripziuns cuntenevan admoniziuns davart il cumpurtament public e privat, las obligaziuns religiusas sco er perscripziuns pertutgant las activitads economicas u il sa vestgir. En regiuns catolicas devi sper las dumengias tut tenor anc passa 30 auters dis da festa religius. (Emissiun dals 26 da settember 2009).

Paul Ragaz – in galiot reformà

Paul Ragaz, in Grischun reformà da Tumein, ha empruvà cun e senza success da manar sco guid clandestinamain ughenonns franzos sur ils cunfins en Svizra. El è vegnì arrestà il 1688 ed ha passentà silsuenter 12 onns en prashuns e sin galeras. El è restà fidaivel a sia confessiun reformada, er sch'ins ha offert ad el pliras giadas la libertad sch'el daventava catolic. Ragaz è daventà l'unfrenda da la finamira dal retg Louis XIV da realisar ses siemi cun revocar il 1685 l'Edict da Nantes: la Frantscha sut in retg, ina lescha ed ina confessiun. (Emissiun dals 23 d'avrigl 2011).

En missiun pietistica en il Grischun l'onn 1757 (parts 1 e 2)

L'onn 1757/58 ha David Cranz, in pietist hernhuteran da la Prussia, visità durant in viadi d'inspecciun e missiun il Grischun reformà. Ses «Reise-Diarium» è in rapport persunal per mauns dal cont Nikolaus Ludwig von Zinzendorf, il superiur dals pietists. Igl è in rapport che lubescha invistas profundas en la situaziun interna da la baselgia reformada dal Grischun e ses represchentants ch'eran dividids durant decennis en aderents da l'ortodoxia reformada ed en simpatisants dals pietists. Ma il diari da Cranz porscha er diversas observaziuns e valitaziuns davart il sistem politic ed economic da las Trais Lias e lur terras subditas. David Cranz ha descrit cun egl critic il sistem d'elecziuns, da las pensius e la corrupziun en il Grischun. (Emissiun dals 20 da schaner e 8 da mars 2013).

La preschentaziun:

Dossier «Forum RTR: Istorgia dal Grischun».

Dapli infurmaziuns:

chatta.ch/?hiid=4648
www.chattà.ch